

印雪軒詩鈔

印雪軒詩鈔卷六

德清俞鴻漸儀伯

北遊草下

戊寅至
庚辰

男穉謹校

孝烈將軍木蘭祠

昔我就傅初曾讀木蘭詩今我曲逆遊更謁木蘭祠古柏森成行枯楊高
無枝繚垣藤蔓繞玉座苔紋滋惟神孝且勇大義君親知胡騎突犯塞漢
將遠出師暮見軍帖下旦與爺娘辭荷戈二十年撲朔迷雄雌即今崇廟
貌猶似從征時刀光陣雲結馬鬣邊風吹我來剔斷碣弔古生遐思明妃
環佩魂蔡女胡笳詞和親已足恥失節猶堪嗤不圖閨閣中有此英雄姿
居人緬舊烈廟食良非私擬俟浴佛日來奠神前卮

四月八日廟
會香火甚盛

棄婦怨

并序

完縣地瘠民貧輕於棄婦是亦風俗之未厚也賦此以貽官斯土

者

怪鴟啼空林寒燈射破屋不聞鰥夫愁惟聞棄婦哭哭聲亦何哀欲去還徘徊結髮為夫妻兩小無嫌猜篝火啟織巷鉛華屏妝臺無端懷二心藉口荒年來舊恩割鴛牒新偶託鴛媒賣妾錢幾何棄妾如塵埃妾心縱愧女貞木亦解出山泉水濁妾身將成楊白花不知飛去當誰家人言妾夫窮爨火屢斷朝來紅恩情無奈中道絕不比紈扇捐秋風妾悲妾命薄百年竟換兔絲託薜蘿山下異時逢那禁回頭淚雙落棄婦棄婦吁可憐古來鏡破難重圓誰歟手司風化權願為稽首慈雲前莫教敝俗常相延

聞孫氏表甥女讀書誌喜

時已聘為
旋兒婦

已是吾家婦纏缸憶買紅經聞傳帳後教想率閨中面澤桃花雪吟情柳絮風為兒籌內助莫教望偏隆

八月初八日寄懷東石同莊

春風講院愛山臺吟袂相邀數往回記得當年名籍甚只今應有捷書來
延平雙劍久沈淪此日雄芒拂拭新花影半簾涼月上筆端定已掃千人
蹤跡經年別

帝畿夜涼庭館掩雙扉燈前想像三條燭怎禁吟魂不北飛

杏花芳訊早春天準擬相從控玉鞭知否故人當此夕客窗支枕算來年
長至前三日入都留別保陽諸故人

盧溝楊柳漸抽萌刻意催人賦北征一葉輕裝原易整兩年小住豈無情
霜華重逼驢鞍冷日彩高懸鳳闕明為語諸君休戀戀託身終擬近蓬瀛
涿州謁張桓侯祠

俗傳侯未過時隱於屠離祠
數武有古井是其藏肉處

勇氣曾傳敵萬夫即今遺廟枕長塗井埋碧蘚碑長在村近樓桑契不孤
織屨未妨先主賤鼓刀豈盡後人誣我來肅謁生遐想辛苦當年漢鼎扶
宛平縣署東偏池荷盛開東石邀往看花即登愛蓮處小飲

楊柳蕭疏拂短堤與君有約屐同攜平鋪素練三篙淨碎翦紅雲萬朵齊
花外涼生水窖近樓頭風壓酒帘低擎杯莫笑流連久此景分明似雪西
次曉重至荷花邊小立移時遇雨而返

踏徧平堤落照紅歸來夢尚繞花叢要看豔態凝初日重約吟衫冒曉風
一鏡涼波涵瑟瑟四圍香霧散濛濛生憎微雨催人返未暇登樓倒碧筒
重到保陽晤章右泉別駕慶洪即以留別

飛絮撲簾旌跨驢復此行鬢毛憐我換肝膽向君傾久客思鄉土窮途仗
友生天涯分手後雲樹迴含情

高陽道中

疲馬回頭顧僕夫城根楊柳半模糊青帘一角茅檐外無復當年舊酒徒
瀛西寺

聞道瀛西寺十年古道場牆陰藤蔓繞籬落草花香野趣閒中領名心物

外忘往來當孔道翻笑老僧忙

獻縣弔河間獻王

舊是分藩地迢迢溯漢封遺文搜六藝鉅典對三雍謚法朝端重儒修海
內宗誰招浮辯客比美愧無從

濮州書所見

車行如駛不須推陸海茫茫妙想開偷得船家使風法布蓬三尺樹陰來
曹州道中苦雨

一雨竟終日泥深沒馬蹄樹陰惟見犢村落不聞雞渡水車幾覆衝煙路
半迷客衣沾濕盡愁聽鶉鴝啼

曹州題逆旅主人壁

故鄉依舊隔天涯暫息塵勞駐客車天為詩人延好景滿城開偏石榴花
斜陽紅罩柳陰西行盡長堤復短堤七十二坑新水滿風荷萬柄綠初齊

徐州

連山青不斷曲折抱城樓塔勢擎雲起河聲捲地流豪真遊俠窟險稱帝王州晚飯堤邊立憑將勝概收

豐山周忠武公祠

山光如黛潑晴空忠武遺祠夕照中報國原非徒一死守城安得盡如公全家戰血埋纔畢兩鎮降書到竟同我欲手扶殘碣起重鐫大字表孤忠

祠前有碑已撲

袁江阻雨

南還纔喜換扁舟又被天公苦雨留急浪排空喧閘口溼雲翻墨壓船頭蓬窗晝閉渾疑夜枕簟涼生畧似秋回首故鄉千里隔幾時打鼓發中流

淮陰侯釣臺

長淮秋水盛於雲閒傍高臺弔夕曛漂母恩猶懷一飯蒯通說肯聽三分

持竿不耐王孫餓，拔幟空成大將勲。
惆悵當年真自誤，王齊王楚枉紛紛。
泊常州城外

熱極未成寐，蓬窗夜獨憑。
淡煙迷雉堞，斜月挂魚罾。
客夢鄉山樹，船喧水驛燈。
歸程欣漸近，今夜宿毘陵。

舟中偕徐檜堂學洙望惠山

一碧渺無際，輕風挂席便。
山光浮隔岸，塔影落遙天。
惜未攜雙屐，同遊第二泉。
推蓬凝望久，清味到茶邊。

曉發錢塘江

斜月落山脊，喔喔晨雞鳴。
扁舟侵曉發，早潮猶未生。
江波白如練，上與天光并。
櫓枝搖不破，萬頃涵空明。
遙山翠欲滴，一桁空中橫。
孤帆翦江去，都向船頭迎。
繫余客京華，四載嗟無成。
今茲推蓬望，快洗塵容清。
買山雖未遂，看山誰無情。
終當此卜宅，願與江神盟。

富春

朝發武林城夕過富春渚富春山色佳推篷屢延佇或如髻樣聳或作眉
態嫵萬朶青芙蓉厥狀難具數况當秋深後朗若新過雨探頭夕陽外似
欲與客語我將艤棹登榜人不我許遙看晴翠飛對之輒起舞詩期謝監
吟畫擬王蒙撫一笑語雙眼茲遊不負汝

七里瀧

我聞長年語嚴瀨七里耳若遇打頭風乃至七十里今我越中遊兩日坐
篷底陡遇一灘來大聲突然起篙師猛用力退尺進僅咫尺空餘邪許聲兩
岸喧不已滿船盡攢眉而我獨色喜桐廬山水窟天下莫與比審視猶恐
遺安用疾如駛倚篷吟且眺日暮煙凝紫四顧不見人漁唱荻花裏

嚴子陵釣臺

故人天子兩無權獨自持竿大澤邊七里波光容寄傲一朝士氣仗開先

蒲輪鄭重頒新詔
蘆笛蒼茫隔暮煙
我望祠堂增仰止
登高惜負佩萸天
是日重陽

蘭溪

一灘復一灘
灘灘高於屋
一峯復一峯
峯峯翠如沐
行到峯斷處
灘勢始一束
居人數千家
茅屋臨流築
縣小當孔道
浸漓舊風俗
何來大腹賈
蘭橈岸旁宿
老嫗持畫漿
少婦調絲竹
廣筵布中央
珍錯羅海陸
玉腕奉一觴
珠喉歌一曲
自笑太憨生
那有修來福
晚飯花樓底
惟拭看山目

到金華

為有看山癖
扁舟到浙東
人家秋色裏
城郭夕陽中
水淺澄波鏡
橋長鎖玉虹
一椽何處借
凝望屢推篷

歸舟至桐廬遇雨

憶昨扁舟上嚴瀨
光射柁樓日杲杲
芙蓉萬點排空來
羅列船頭供眼飽

化工布景忌複筆似先搨得雲林稿黑煙一縷空中凝細雨千絲篷背繞
客遊三日理歸裝頓覺奇峰出意表船頭方看潑翠迎船尾突作迴身抱
洗盡鉛華露真面橫看側看無不好斷虹注澗雨漸歇斜照銜江天尚早
水清看網子陵魚林密聞啼畫眉鳥過盡危灘六七重依舊青山青未了
即看畫景極空濛那禁吟情寄繚邈迴思昨夜卧篷窗枕畔廉纖直到曉
叢桂山房夜話次銅士韻

曾與梅花約殘冬再放船擁爐逢此夕聯榻憶當年我愧磨驢拙君能飛
鳥憐坐聽更析轉猶自未成眠

苦被微名縛頻年感索居五更千里夢兩地數行書遠道人歸後寒宵月
上初清談無限好真悔曳長裾

樊榭山房集中有中秋月夜登城南鮑氏溪樓之作即榆蔭樓也虛
白邀余同和即次樊榭原韻

昔者樊榭翁詩名播萬口偶訪玉湖秋維舟岸旁柳城南攬勝地無出茲樓右看山夕照餘玩月黃昏後往迹浸復湮溪光仍繞牖我友樹雙榆卜居今已久慨然緬古人曾此銜杯酒短章擘箋和佳句丸脫手我欽前輩風亦復如山斗欲訪舊遊蹤惜無百歲叟

感事四首

不過蚩蚩間左民無端小劫一番新後來空鑒岡焚玉前事原遲突徙薪漫恃秋原鷹善擊須知春徑雉難馴到頭試向村邊聽多少吞聲夜哭人養癰失策憶從前井底蛙尊又幾年任俠巧收鄉曲譽催租欲抗縣官權機危久已同遊釜吏到猶能禁索錢鼠技未窮螳臂健暫時撐住杞人天樓船下瀨竟虛行虎穴窮探再請纓已見軍符頒晉鄙肯留複壁匿臺卿頽垣懸耒耜男散古廟焚香火老迎萬頃黃雲秋稼熟腰鎌閒寂不聞聲事過方知禍有胎飛鴻重集不勝哀餘生幸免溝中瘠此地長留劫後灰

攘攘仍容奸漏網熙熙誰引衆登臺為民請命無他法銅斛還須更鑄來

送竈轎

此與利市船皆茗上俗也舊有詩已失其稿以樂府體補之

送竈轎巧從送竈寓媚竈滿街爆竹歲將殘纖手特倩茗娘造不折宋王
獮寓言之賦何荒唐不結昌黎柳送窮之車亦非耦燭花紅燦宵來筵譁
然一笑陳神前老婦盛酒老翁拜大家相送歸青天天門開九重天路越
萬里乘風而起竈君喜晨炊不待祭黃羊管取致富來年始

利市船

利市船利市之來非偶然去年薦神不我吐乃得嘉惠蒙今年一日一日
東逝水匆匆又賽常年紙梅花香裏燈影紅重向神前乞利市利市酒為
神沽利市船為神糊媚神直似傳芭巫區區之意神知無夜深唱罷送神
曲偃樓還望空中祝明年載得利市來認取儂家舊茅屋

壓歲錢

壓歲錢壓兒枕底延兒年劣如荇葉盡選出攜來箇箇苔紋圓去年錢最多猶藏阿母笥曾幾何時歲又除紅箋門貼宜春字東家送錢來穿以朱絲繩西家送錢來鞋更添紅綾小兒豈有和嶠癖亦復樂意眉梢凝夜深更尾阿翁後阿翁含笑拍雙手城中昨日來索逋檢點空囊已無有

財主圓

財主圓財主家磨如風旋碾出香杭白於雪大家搓向梅花邊一盤先備賽神用一盤留待上燈供其餘不用裹饅餽深恐來朝乞兒衆門初開乞兒來飢驅不似常時哀口頭吉語唱爛熟新年大發財翁財前村後村乞未已囊負而去乞兒喜去年畢竟是豐年乞得粉餐都是米

歲數有雜以糠者

迎竈神

迎竈神竈神下望茅檐春瓜期例滿一年代雲旗夜半來紛紛去年迎稍遲無奈竈神老竈前百事俱欠好屠蘇飲罷夜已深相戒來朝起要早五

更啟戶星滿天舍南舍北俱酣眠一聲爆竹振窮巷今年迎在人家先香煙濃繞竈門裏整衣再拜心竊喜眼中彷彿竈神來前導嬌孫後六女以俗迎早則竈神少而靈遲則老而不靈矣故夜未半即爭起迎神

請年酒

請年酒一年一度請親友今年大熟加倍豐更展殷勤到鄰叟主人之酒旨且多當筵飛勸金叵羅主人之情淡而永苦道夜深聊禦冷辛盤纔赴東家招西家治具邀來宵笑煞將軍不負腹過門大嚼何其豪歲朝製罷椒花頌直到落燈身始空門前折柬虛無人依舊家中飽道甕

印雪軒詩鈔卷七

德清俞鴻漸儀伯

後北遊草上

辛巳至
癸未

男棧謹校

辛巳北上壬午即應吳小匏大令之聘薄遊萬全因長安之不易居
遂短衣而歌出塞遇亦窮矣然而攬居庸之疊翠尋甌脫之窮邊駐
馬吟豪呼鷹氣壯亦玉局翁所謂茲遊奇絕冠平生者也詩釐為二
卷既自慨亦自幸焉

將赴都門口占贈內得四絕句

拋却江湖舊釣竿十年兩度上長安楊花如雪催人別多恐妝臺不忍看
桑葉初生已似錢光陰正值養蠶天轉因小住添佳趣閒看隣家捉犬眠
白晢嬌兒玉不如祇防頑性未全除日長停却閒針綫滿地花陰課讀書
畢竟初心未肯灰千金市駿盼燕臺閨中亦怕登程晚日祝天公送雨來

時以久旱水路不通故未成行

三月二十八日北上

到家纔八月又整北遊裝
奢望簪紅杏離愁挂綠楊
歸真巢燕暫踏笑磨
驢忙去去長安道鞭絲曩夕陽

憶昔居非易而今役又新
裝輕如一葉伴少得三人
時與戚黨同行暝色侵
行笈心旌逐去輪
看花平日志肯負帝城春

蘇州留別平泉

芳草天涯黯別魂
暫因相訪泊吳門
看花

帝里春三月攜手河梁酒
一樽飛鳥有情還戀侶
轉蓬無奈欲辭根
勞君楊柳殷勤折回首隄邊日又昏

衆興題壁

陰雲偏耐朔風吹
得得疲驢到店遲
燈影半牀遊子夢
墨花四壁故人詩